



客(海陸)／懷想／☆☆★★

六月割禾

六、七月金金个日頭，晒到人頭暈腦脹、懶蜈蚣仔，園在屋下看看電視、睡下當晝，早就變成大家个習慣。這下个人實在好命，就算耕種人，因為機器耕作膠休耕，「六月天公，家神牌會停動。」个日仔少見咧！時代無共樣哩！

頭擺，割禾係農家个大事情，一早，一屋大細就無閒直掣，係屋下耕有甲零田，因為阿爸、阿叔係公務員，對田事無內行，所以全靠房族个叔公搵手。愛割禾咧，叔公會請好師傅、尋好禾埕、準備好愛用个工具，全毋使阿爸愁慮。倒轉來無閒个係阿姆、阿姪兩子嫂，除了煮三餐正餐外，還愛煮兩餐點心。長下擔竿个一頭係綠豆湯、一頭就米粉湯；一頭甜米篩目、一頭就鹹米篩目；一頭仙草、一頭就竹筍糜，點心一定有鹹、有甜、有變化。阿姆兩子嫂，朝煮或煮點心，點心煮或煮晝，晝煮或又煮點心，點心煮或就愛煮夜，歸日煮無停，最艱苦个還係六月天公在滾水頂高擦米篩目，分滾水呵到汗流脈落。

六月个日頭盡得人畏，最辛苦个還係一身晒到烏刻刻、做到汗珠溶溶跌个割禾師傅，佢兜愛痾等腰骨割禾、愛孩等重重个穀擔、還愛大力踩機器槌打穀，樣樣事就係食力、艱苦。阿爸體恤師傅个辛苦，除了三餐加菜外，完工該暗晡還會煮一桌豐豐沛沛个桌席請師傅，有雞肉盤、鴨仔湯；有爌肉、魚仔；有薑絲炒大腸、芹菜炒魷魚等等，還會準備涼涼个凉水、沙士、麥酒，一定愛分師傅食著滿意、咁到歡喜。

在佢做細人仔个時節，除了過年過節、做平安戲以外，愛割禾做完工正有係豐沛好食。到較大兜，阿爸會特別擇放寮日來做完工，分外肯讀書、做事个細人仔做得轉來食一餐豐沛。人講：「六月天公手痛，痛到笑；三十暗晡嘴痛，痛到噉。」對佢屋下个細人仔來講，六月天公手痛毋痛無關係，嘴係痛，就會有好噉咧！這下想起來，佢從細田事就毋使搵手做，食顛倒毋識少過，實在好命、實在幸福。

作者：張美容

☆詞彙學習☆

- 【懶蜈蚣仔】nan` guai` guai` er：意興闌珊的樣子。【踩】dio：踩踏。
【六月天公】liug ngied` tien` gung`：農曆六月天。【機器槌】gi` hi` fong：腳踩的打穀機器。
【呵】ho`：燻。氣體釋出或上衝，接觸物體。
【溶溶跌】dab` dab` died：一直掉個不停的樣子。【顛倒】dien` do`：反而。

☆文法學習☆

【樣樣】rhong+ rhong+：每一樣。「樣樣」屬於名詞重疊的構詞方式，表示「每一、逐一」之意，與「逐+N_{名詞}」相仿。例如：日日（每天）、夜夜（每天晚上）、儕儕（人人）。